

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՊԵՏԱԿԱՆ ԵԿԱՄՈՒՏՆԵՐԻ ԿՈՄԻՏԵ
ՀԱՐԿԱՅԻՆ ԵՎ ՄԱՔՍԱՅԻՆ ՄԱՐՄԻՆՆԵՐԻ ԲՈՂՈՔԱՐԿՄԱՆ
ՀԱՆՁՆԱԺՈՂՈՎ**

ՈՐՈՇՈՒՄ N 36/39

ք.Երևան

12 մայիսի 2023թ.

Հայաստանի Հանրապետության պետական եկամուտների կոմիտեի հարկային և մաքսային մարմինների բողոքարկման հանձնաժողովը (այսուհետ նաև՝ Հանձնաժողով), քննության առնելով ՀՀ ՊԵԿ իրավաբանական վարչության պետի Վարչական իրավախախտման գործի վերաբերյալ 17.01.2023թ. թիվ 493181/09 որոշման դեմ «Կենսաբժշկական Սարքավորումների Մասնագետների Ասոցիացիա» ՀԿ (ՀՎՀՀ 00227838) նախագահ Նաիրա Էլոյանի դիմում-բողոքը՝

ՊԱՐԶԵՑ

1. Բողոքարկման առարկան, դիմում-բողոքով բերված փաստարկները և ներկայացված պահանջները

«Կենսաբժշկական Սարքավորումների Մասնագետների Ասոցիացիա» ՀԿ Նախագահ Նաիրա Էլոյանի (այսուհետ նաև՝ բողոքաբեր) դիմում-բողոքում մասնավորապես նշվում է, որ նշված որոշման հիմք հանդիսացող նախորդող որոշումներից որևէ մեկին որևէ կերպ ծանուցված չի եղել, վարչական վարույթ իրականացնող մարմինը որևէ նախորդող վարչական տույժ նշանակելու մասին որոշում իրեն չի ուղարկել, որպեսզի հնարավորություն ունենար ըստ անհրաժեշտության ներկայացնել զրոյական հաշվետվությունը և խուսափել հետագա 50,000 ՀՀ դրամ և 200,000 ՀՀ դրամ տույժերից:

Նշվում է, որ իրեն երեք անգամ վարչական տույժի են ենթարկել 2020թ-ի զրոյական հաշվետվությունը չներկայացնելու համար, այն դեպքում երբ Հասարակական Կազմակերպությունը ստեղծվել է 2020թ. հոկտեմբերի 7-ին և չի գործել մինչև 2021թ. դեկտեմբերի 24-ը, երբ առաջին անգամ գրանցել է աշխատող:

Բողոքաբերը նշում է, որ ՊԵԿ-ը երեք անգամ վարչական տույժի է ենթարկել ՀԿ-ի նախագահին չաշխատած ժամանակաշրջանի համար հաշվետվություն չներկայացնելու համար, ու ընդ որում որևէ կերպով չի ծանուցել նրան որոշումները, 50,000 դրամ որոշման մասին տեղեկացել է միայն այն ժամանակ երբ հաշվի վրա արգելանք է դրվել:

Ուստի խնդրում է անվավեր ճանաչել թիվ 493181/09 որոշումը, ինչպես նաև դրան նախորդող որոշումները, որոնց համարներին չի տիրապիտում, քանի որ չի ստացել, իսկ այս

որոշման մասին տեղեկացել է այլ անձից, քանի որ այն ուղղարկված է եղել նրա էլեկտրոնային հասցեին:

2. Դիմում-բողոքի քննության համար էական նշանակություն ունեցող փաստերը

ՀՀ ՊԵԿ իրավաբանական վարչության պետի Վարչական իրավախախտման գործի վերաբերյալ 17.01.2023թ. թիվ 493181/09 որոշմամբ (այսուհետ նաև՝ Որոշում) մասնավորապես արձանագրվել է.

ՀՀ ՊԵԿ իրավաբանական վարչության պետ Արման Մնացականյանս, ուսումնասիրելով 12.01.2023 թվականի թիվ 49416 վարչական իրավախախտման վերաբերյալ արձանագրությունը, քննելով թիվ 49416 վարույթը և կից նյութերը, պարզել է, որ «ԿԵՆՍԱԲԺՇԿԱԿԱՆ ՍԱՐՔԱՎՈՐՈՒՄՆԵՐԻ ՄԱՍՆԱԳԵՏՆԵՐԻ ԱՍՈՑԻԱՑԻԱ» ՀԿ-ի (ՀՎՀՀ 00227838, հասցե՝ ք. Երևան, Արաբկիր, Այգեձորի 1 նրբ. 22շ., բն. 17) նախագահ Նաիրա Էլոյանը համաձայն «Հասարակական կազմակերպությունների մասին» ՀՀ օրենքի 24-րդ հոդվածով սահմանված ժամկետում Կազմակերպությունների կողմից հրապարակվող հաշվետվությունների համար նախատեսված կայքում չի հրապարակել 2020թ-ի տարեկան հաշվետվությունը, ինչի համար համաձայն Վարչական իրավախախտումների վերաբերյալ ՀՀ օրենսգրքի 169.26 հոդվածի 1-ին մասի ՀՀ ՊԵԿ իրավաբանական վարչության պետի 26.07.2021թ-ի թիվ 025225/09 որոշմամբ «ԿԵՆՍԱԲԺՇԿԱԿԱՆ ՍԱՐՔԱՎՈՐՈՒՄՆԵՐԻ ՄԱՍՆԱԳԵՏՆԵՐԻ ԱՍՈՑԻԱՑԻԱ» ՀԿ-ի նախագահ Նաիրա Էլոյանի նկատմամբ կիրառվել է վարչական տույժ՝ նախազգուշացում:

ՀՀ ՊԵԿ իրավաբանական վարչության պետի 26.07.2021թ-ի թիվ 025225/09 նախազգուշացման որոշման մասին իրազեկվելու օրվանից հետո երեսուն օրվա ընթացքում Նաիրա Էլոյանի կողմից սույն հոդվածով նախատեսված խախտումը չի վերացվել, ինչի արդյունքում Նաիրա Էլոյանի նկատմամբ Վարչական իրավախախտումների վերաբերյալ ՀՀ օրենսգրքի 169.26 հոդվածի 2-րդ մասով հարուցվել է վարչական վարույթ, և ՀՀ ՊԵԿ իրավաբանական վարչության պետի 15.04.2022թ. թիվ 445783/09 որոշմամբ կիրառվել է վարչական տուգանք 50.000 ՀՀ դրամի չափով:

ՀՀ ՊԵԿ իրավաբանական վարչության պետի 15.04.2022թ-ի թիվ 445783/09 որոշման մասին իրազեկվելու օրվանից հետո երեսուն օրվա ընթացքում Նաիրա Էլոյանի կողմից սույն հոդվածով նախատեսված խախտումը չի վերացվել, ինչի արդյունքում Նաիրա Էլոյանի նկատմամբ հարուցվել է վարչական վարույթ համաձայն Վարչական իրավախախտումների վերաբերյալ ՀՀ օրենսգրքի 169.26 հոդվածի 3-րդ մասի:

Կողմին հայտնաբերելու նպատակով ձեռնարկվել են համապատասխան միջոցառումներ: Գործում առարկություն կամ բացատրություն առկա չէ:

Ելնելով վերոգրյալից և ղեկավարվելով Վարչական իրավախախտումների վերաբերյալ ՀՀ օրենսգրքի 32-րդ հոդվածի 2-րդ մասով, 244.2, 281 հոդվածներով և 282 հոդվածի 1-ին մասի 1-ին կետով՝ Նաիրա Էլոյանի նկատմամբ կիրառվել է վարչական տույժ՝ նշանակվել է տուգանք

200.000 (երկու հարյուր հազար) դրամի չափով՝ համաձայն Վարչական իրավախախտումների վերաբերյալ ՀՀ օրենսգրքի 169.26 հոդվածի 3-րդ մասի:

3. Բողոքարկման առարկային վերաբերվող իրավական կարգավորումներ և եզրահանգումներ

«Հասարակական կազմակերպությունների մասին» ՀՀ օրենքի 24-րդ հոդվածի 2-րդ մասի համաձայն՝ Կազմակերպության գործունեության տարեկան հաշվետվությունը ներառում է հետևյալ տեղեկատվությունը.

1) Կազմակերպության լրիվ անվանումը, հարկ վճարողի հաշվառման համարը (<ՎՀՀ>), գտնվելու վայրը (ենթակա է հրապարակման կազմակերպության կողմից համապատասխան նշման դեպքում), պետական գրանցման համարը, տարին, ամիսը, ամսաթիվը, հեռախոսահամարը, էլեկտրոնային փոստը և պաշտոնական ինտերնետային կայքը (առկայության դեպքում).

2) գործադիր մարմնի ղեկավարի անունը և պաշտոնը.

3) կանոնադրությամբ սահմանված գործունեության առարկան և նպատակները.

4) Կազմակերպության անդամների (հաշվետու տարվա դեկտեմբերի 31-ի դրությամբ), ինչպես նաև այն կամավորների (հաշվետու տարվա ընթացքում) թիվը, որոնց աշխատանքի տևողությունը գերազանցում է շաբաթական 20 ժամը.

5) հաշվետու տարվա ընթացքում գումարված ժողովների քանակը.

6) հաշվետու տարվա ընթացքում իրականացված ծրագրերի անվանումը և համառոտ նկարագրությունը (վայր, նպատակ, կարգավիճակ).

7) տարեկան մուտքերի (դրամական և (կամ) գույքային) ընդհանուր գումարը.

8) օգտագործված դրամական միջոցները և (կամ) շարժական, անշարժ գույքը.

9) հաշվետու տարվա ընթացքում Կազմակերպության կողմից ձեռնարկատիրական գործունեություն իրականացնելու տեսակի և դրա արդյունքում ստացված շահույթի օգտագործման վերաբերյալ տեղեկատվությունը:

Նույն հոդվածի 4-րդ մասի համաձայն՝ Կազմակերպությունը պարտավոր է յուրաքանչյուր տարի՝ մինչև հաշվետու տարվան հաջորդող մայիսի 30-ը, Կազմակերպությունների կողմից հրապարակվող էլեկտրոնային հաշվետվությունների համար նախատեսված համակարգի (այսուհետև՝ Համակարգ) անձնական էջում և իր պաշտոնական ինտերնետային կայքում (այդպիսին ունենալու դեպքում) հրապարակել գործունեության տարեկան հաշվետվությունը:

Իր հերթին, «Վարչական իրավախախտումների վերաբերյալ» ՀՀ օրենսգրքի 169.26-րդ հոդվածի համաձայն՝

Հիմնադրամների կողմից հաշվետվությունը թերի հրապարակելը կամ օրենքով սահմանված կարգով և ժամկետներում հիմնադրամների կողմից հաշվետվությունը չհրապարակելը՝ առաջացնում է նախազգուշացում հիմնադրամների պաշտոնատար անձանց նկատմամբ:

«Հասարակական կազմակերպությունների մասին» Հայաստանի Հանրապետության օրենքով նախատեսված պարտադիր հրապարակման ենթակա հաշվետվությունը թերի հրապարակելը, օրենքով սահմանված կարգով և ժամկետներում չհրապարակելը առաջացնում են նախազգուշացում հասարակական կազմակերպության իրավասու պաշտոնատար անձանց նկատմամբ:

Օրենքով սահմանված կարգով նախազգուշացվելուց հետո՝ 30 օրվա ընթացքում, հասարակական կազմակերպության կողմից Հայաստանի Հանրապետության կառավարությանն առընթեր պետական եկամուտների կոմիտեի պահանջը չկատարելը՝ առաջացնում է տուգանքի նշանակում՝ հասարակական կազմակերպության իրավասու պաշտոնատար անձանց նկատմամբ՝ սահմանված նվազագույն աշխատավարձի հիսնապատիկի չափով:

Տուգանքի նշանակման օրվանից հետո՝ 30 օրվա ընթացքում, հասարակական կազմակերպության կողմից Հայաստանի Հանրապետության կառավարությանն առընթեր պետական եկամուտների կոմիտեի նախազգուշացման պահանջները չկատարելը կամ ոչ պատշաճ կատարելը՝ առաջացնում է տուգանքի նշանակում՝ հասարակական կազմակերպության իրավասու պաշտոնատար անձի նկատմամբ՝ սահմանված նվազագույն աշխատավարձի երկուհարյուրապատիկի չափով:

Քննարկվող դեպքում, դիմում-բողոքով ներկայացված՝ վիճարկվող որոշման հիմք հանդիսացող նախորդող որոշումներից որևէ մեկին որևէ կերպ ծանուցված չլինելու մասին բողոքաբերի պնդումներին անդրադառնալով՝ Հանձնաժողովը հայտնում է, որ վարույթում առկա փաստաթղթերի ուսումնասիրությունից պարզվել է, որ.

Բողոքաբերի կողմից հասարակական կազմակերպության 2020թ. հաշվետվությունը չհրապարակելու վերաբերյալ 16.07.2021թ. հարուցվել է վարչական վարույթ, որի վերաբերյալ ծանուցագիրը փոստային առաքմամբ ուղարկվել է բողոքաբերի բնակության վայրի հասցեով՝ ք. Երևան, Արաբկիր, Այգեձորի 1 նրբ. 222, բն. 17, որի ծրարը հետ է վերադարձվել «Անհայտ» նշագրումով: Միաժամանակ նույն ծանուցագիրը 19.07.2021թ. ուղարկվել է Բողոքաբերի կողմից ՀՀ ՊԵԿ տրամադրված պաշտոնական էլ. փոստ հասցեին՝ manuk.grigoryan@mgg.am: Բողոքաբերը ծանուցված լինելով արձանագրության կազմման, գործի քննության վայրի և ժամանակի մասին չի ներկայացել, գործում առկա չի եղել գրավոր առարկություն կամ բացատրություն: Արդյունքում 26.07.2021թ. կայացվել է թիվ 025225/09 նախազգուշացման որոշումը: Թիվ 025225/09 որոշումը փոստային առաքմամբ ուղարկվել է Բողոքաբերի բնակության վայրի հասցեով, որի ծրարը ետ է վերադարձվել «Չպահանջված» նշագրումով:

ՀՀ ՊԵԿ Իրավաբանական վարչության պետի կողմից բողոքաբերի վերաբերյալ կայացված թիվ 025225/09 որոշումը 25.02.2022թ. տեղադրվել է Հայաստանի Հանրապետության հրապարակային ծանուցումների պաշտոնական ինտերնետային կայքում (հարկ է նկատի ունենալ, որ իրավահարաբերության ծագման պահին գործող դրույթներով

վարչական ակտը էլեկտրոնային փոստի միջոցով պատշաճ իրազեկելու հնարավորություն սահմանված չի եղել):

ՀՀ ՊԵԿ Իրավաբանական վարչության պետի 26.07.2021թ-ի թիվ 025225/09 նախագգուշացման որոշման մասին իրազեկվելու օրվանից հետո երեսուն օրվա ընթացքում Բողոքաբերի կողմից խախտումը չի վերացվել, ինչի արդյունքում վերջինիս նկատմամբ Վարչական իրավախախտումների վերաբերյալ ՀՀ օրենսգրքի 169.26 հոդվածի 2-րդ մասով հարուցվել է վարչական վարույթ, որի վերաբերյալ ծանուցագիրը փոստային առաքմամբ ուղարկվել է Բողոքաբերին, որը ետ է վերադարձվել «Չպահանջված» նշագրումով, միաժամանակ 28.03.2022թ. ուղարկվել է նաև manuk.grigoryan@mgg.am էլ փոստին: Վերջինս, սակայն, ծանուցված լինելով արձանագրության կազմման, գործի քննության վայրի և ժամանակի մասին չի ներկայացել, չի ներկայացրել առարկություն կամ բացատրություն: Արդյունքում 15.04.2022թ. կայացվել է թիվ 445783/09 որոշումը, որով կիրառվել է վարչական տուգանք 50.000 ՀՀ դրամի չափով, որն ուղարկվել է փոստային առաքմամբ, սակայն ծրարը ետ է վերադարձվել «Չպահանջված» նշագրումով:

ՀՀ ՊԵԿ Իրավաբանական վարչության կողմից 15.04.2022թ-ի թիվ 445783/09 որոշման մասին իրազեկվելու օրվանից հետո երեսուն օրվա ընթացքում Բողոքաբերի կողմից սույն հոդվածով նախատեսված խախտումը չի վերացվել, ինչի արդյունքում վերջինիս նկատմամբ հարուցվել է վարչական վարույթ համաձայն Վարչական իրավախախտումների վերաբերյալ ՀՀ օրենսգրքի 169.26 հոդվածի 3-րդ մասի:

Տվյալ դեպքում, Հանձնաժողովը անհրաժեշտ է համարում նշել, որ Վարչական իրավախախտումների վերաբերյալ ՀՀ օրենսգրքով կարգավորված չէ վարչական վարույթների վերաբերյալ ծանուցումներն ուղարկելու ընթացակարգը, այդ իսկ պատճառով մինչև 15.06.2022թ-ը ծանուցումներն ուղարկվել է «Վարչարարության հիմունքների և վարչական վարույթի մասին» ՀՀ օրենքի 59-րդ հոդվածով սահմանված կարգով:

«Վարչարարության հիմունքների և վարչական վարույթի մասին» օրենքում լրացում և փոփոխություն կատարելու մասին ՀՀ օրենքը 15.06.2022թ. լրացվել է 29.1 հոդվածով, որի 29.1 հոդվածի 2-րդ մասի համաձայն՝ Վարչական մարմինն իր նախաձեռնությամբ վարչական վարույթ հարուցելիս վարույթի մասնակիցներին կամ նրանց ներկայացուցիչներին օրենքով սահմանված կարգով ծանուցում է վարչական վարույթ հարուցելու մասին, եթե վարչական վարույթի հարուցումից մինչև վարչական ակտն ընդունելու միջև ընկած ժամանակահատվածը երեք օրից ավելի է:

Նույն հոդվածի 3-րդ մասի համաձայն՝ Վարչական վարույթի ընթացքում ծանուցումներն ուղարկվում են փոստային առաքմամբ կամ հանձնվում են առձեռն, իսկ սույն հոդվածով նախատեսված դեպքերում ուղարկվում են էլեկտրոնային փոստի հասցեով կամ հաղորդակցության այլ միջոցներով:

Համաձայն «Վարչարարության հիմունքների և վարչական վարույթի մասին» ՀՀ օրենքի 59-րդ հոդվածի՝ Վարչական մարմինը վարույթի մասնակիցներին վարչական ակտի ընդունման

մասին իրազեկում է սույն հոդվածով նախատեսված հանձնման կամ հրապարակման եղանակով:

Գրավոր վարչական ակտը, ընդունումից հետո՝ եռօրյա ժամկետում, պետք է հանձնվի վարույթի մասնակիցներին: Դա կարող է իրականացվել պատվիրված փոստով, այդ թվում՝ ստանալու մասին ծանուցմամբ, հասցեատիրոջը ստորագրությամբ առձեռն հանձնելու, ինչպես նաև հանձնման այնպիսի եղանակներով, որոնք թույլ են տալիս հաստատել հասցեատիրոջ կողմից ակտը ստանալու կամ օրենքով սահմանված դեպքերում պատշաճ ծանուցված լինելու փաստը:

Նույն օրենքի 60-րդ հոդվածի համաձայն՝ գրավոր վարչական ակտն ուժի մեջ է մտնում այդ ակտի ընդունման մասին՝ սույն օրենքի 59-րդ հոդվածով սահմանված կարգով իրազեկելուն հաջորդող օրվանից, եթե օրենքով կամ այդ ակտով այլ բան նախատեսված չէ:

Համաձայն Վարչական իրավախախտումների վերաբերյալ ՀՀ օրենսգրքի 283 հոդվածի՝ եթե հնարավոր չէ որոշումը հանձնել առձեռն, կամ հասցեատերը չունի պաշտոնական էլեկտրոնային փոստ (բնակչության պետական ռեգիստրի տվյալների համաձայն՝ անձը չունի նույնականացման քարտ, կամ պետական ռեգիստրի գրանցամատյանում չկա տեղեկատվություն իրավաբանական անձի էլեկտրոնային փոստի վերաբերյալ) և գրավոր չի դիմել որոշման մասին իր հայտնած հեռահաղորդակցության միջոցով ծանուցելու խնդրանքով, կամ սույն հոդվածի 2-րդ մասի 3-րդ կետով սահմանված կարգով որոշումը հանձնելուց հետո՝ հնգօրյա ժամկետում, չի ստացվել հավաստում պարտավոր անձի կողմից վարչական ակտի մասին ծանուցումն ստացած լինելու փաստի մասին, ապա որոշումն ուղարկվում է պատվիրված նամակով՝ հետադարձ ծանուցմամբ տվյալ վարչական վարույթի ընթացքում անձի հայտնած հասցեով, իսկ դրա բացակայության դեպքում՝ անձի հաշվառման հասցեով: Եթե փոստով ուղարկված որոշումը վերադարձվել է, կամ ծանուցման փաստը չի հաստատվել, կամ հասցեատերը հրաժարվել է ստանալ պատշաճ կարգով ուղարկված (հանձնվող) որոշումը, և առկա է որոշումը հանձնողի նշումն այդ մասին, ապա որոշումը տեղադրվում է Հայաստանի Հանրապետության հրապարակային ծանուցումների պաշտոնական ինտերնետային կայքում: Այն դեպքերում, երբ որոշումը տեղադրվում է Հայաստանի Հանրապետության հրապարակային ծանուցումների պաշտոնական ինտերնետային կայքում, ապա որոշումը համարվում է հանձնված (պատշաճ ծանուցված) որոշման մասին ծանուցումն ինտերնետային կայքում տեղադրելու օրվան հաջորդող հինգերորդ օրը:

Նշված իրավական նորմերի վերլուծությունից ակնհայտ է, որ վարույթն իրականացնող մարմինը կարող է ընտրել պատշաճ ծանուցման եղանակներից որևէ մեկը:

Հաշվի առնելով վերը նշվածը և գործում առկա բոլոր ապացույցները, Հանձնաժողովը հայտնում է, որ տվյալ դեպքում վարչական մարմնի կողմից իրականացվել է պատշաճ վարչարարություն, ուստի ներկայացված առարկությունները անհիմն են և չեն կարող վարչական ակտի բեկանման հիմք հանդիսանալ:

Ելնելով վերոգրյալից՝ Հանձնաժողովը գտնում է, որ ՀՀ ՊԵԿ իրավաբանական վարչության պետի 17.01.2023թ. վարչական իրավախախտման գործի վերաբերյալ թիվ 493181/09 որոշումը կայացվել է ՀՀ օրենսդրության պահանջներին համապատասխան:

4. Եզրափակիչ մաս

Ելնելով քննարկման արդյունքներից և ղեկավարվելով Հայաստանի Հանրապետության հարկային օրենսգրքի 20-րդ բաժնով, «Մաքսային ծառայության մասին» Հայաստանի Հանրապետության օրենքի 37-րդ հոդվածով, Հանձնաժողովը

ՈՐՈՇՈՒՄ Է՝

ՀՀ ՊԵԿ իրավաբանական վարչության 17.01.2023թ. վարչական իրավախախտման գործի վերաբերյալ թիվ 493181/09 որոշման դեմ «Կենսաթշկական Սարքավորումների Մասնագետների Ասոցիացիա» ՀԿ Նախագահ Նաիրա Էլոյանի դիմում-բողոքը մերժել:

Սույն որոշումն ուժի մեջ է մտնում իրազեկելուն հաջորդող օրվանից:

Սույն որոշմանը չհամաձայնելու դեպքում այն ուժի մեջ մտնելու օրվանից երկու ամսվա ընթացքում կարող է բողոքարկվել ՀՀ վարչական դատարան:

ՀԱՆՁՆԱԺՈՂՈՎԻ ՆԱԽԱԳԱՀԻ Ժ/Պ՝

5/17/2023

X 

ԱՐԹՈՒՐ ՄԱՆՈՒԿՅԱՆ

Signed by: MANUKYAN ARTUR 3801690067

ԱՐԹՈՒՐ ՄԱՆՈՒԿՅԱՆ